



Sesida dals

Communitgà ils

Protocol nr.

24 da schaner 2023

25 da schaner 2023

33/2023

### **Incumbensa Degiacomi**

concernent il rinforz da la tgira ed assistenza ambulanta

### **Resposta da la Regenza**

Las personas che tgiran lur confamigliars èn ina pitga impurtanta per realisar il princip «ambulant avant staziunar» da la politica da sanadad. La tgira da confamigliars è per regla ina chargia per il corp sco er per la psica, en spezial sch'ella vegn fatga sper l'activitad professiunala. Personas che tgiran lur confamigliars pon ademplir questa incumbensa a lunga vista mo, sch'ellas han a disposiziun purschidas da distgargia per proteger lur sanadad. Talas purschidas da distgargia èn per exempel dimoras curtas per personas che basegnan tgira en chasas da personas attempadas e da tgira.

Las dimoras curtas da personas che basegnan tgira en chasas da personas attempadas e da tgira han l'intent da distgargiar las personas che tgiran ed assistan lur confamigliars. Uschia pon ellas per exempel far vacanzas senza quitads. Cun metter a disposiziun letgs da tgira per dimoras curtas en chasas da personas attempadas e da tgira èsi pia pussaivel da retardar u schizunt d'evitar la collocaziun da personas che basegnan tgira en ina chasa da personas attempadas e da tgira. Las chasas da personas attempadas e da tgira porschan gia oz letgs da tgira per dimoras curtas da personas che basegnan tgira. Il problem principal per las chasas da personas attempadas e da tgira è en quest connex ch'ils custs per tegnair a disposiziun letgs da tgira per dimoras curtas na vegnan betg indemnissads dal maun public.

En sia resposta dals 8 d'avrigl 2022 a l'incumbensa Degiacomi concernent impuls en favur da la finanziaziun da la tgira ambulanta e staziunara ha la Regenza empermess da preschentar – en il rom da la proxima revisiun parziala da la Lescha per promover la tgira da personas malsaunas – propostas per indemnissar finanzialmain ils custs per tegnair a disposiziun letgs da tgira per dimoras curtas en chasas da tgira sco er

per ulteriuras puschidas da sustegn, quai per distgargiar las personas che assistan e che tgiran lur confamgliars.

La distgargia da personas che tgiran lur confamgliars tras puschidas da sustegn è cuntegnida sco mesira en il Program da la Regenza 2021 fin 2024. L'Uffizi da sanadad ed il Departament da giustia, segirezza e sanadad elavuran actualmain in project da consultaziun correspondent.

Sa basond sin questas explicaziuns propona la Regenza al Cussegl grond d'acceptar questa incumbensa.



En num da la Regenza

Il president:

Peter Peyer

Il chancelier:

Daniel Spadin